

樓鑰

北行日錄

楊簡

石魚偶記

趙彥衛

雲麓漫鈔

倪思

重明節館伴語錄

倪思

經鉏堂雜誌

全宋筆記

第六編 四

全宋筆記

第六編
四

大象出版社

圖書在版編目(CIP)數據

全宋筆記. 第六編. 四/上海師範大學古籍整理研究
所編. —鄭州:大象出版社,2013.3
ISBN 978-7-5347-7465-2

I. ①全… II. ①上… III. ①中國歷史—史料—宋代
IV. ①K244.066

中國版本圖書館 CIP 數據核字(2013)第 042712 號

全宋筆記		第六編		四	
出版人	王劉純	特約編輯	陳新	責任編輯	郭一凡
整體設計	張勝	出版發行	大象出版社	製版	鄭州市開元路16號450044
印刷	河南新華印刷集團有限公司	印次	2013年3月第一版第1次印刷	開本	640×960 1/16 30.25印張
字數	310千字	定價	798.00元(全10冊)		

目 録

北行日録

樓 鑰 撰

一

石魚偶記

楊 簡 撰

四五

雲麓漫鈔

趙彥衛 撰

八三

重明節館伴語録

倪 思 撰

三〇七

經鉏堂雜誌

倪 思 撰

三二七

◎樓

鑰撰

北行日錄

朱旭强

整理

點校說明

《北行日錄》上下卷，樓鑰撰。樓鑰（一一三七—一二一三），字大防，號攻媿主人，明州鄞縣人。宋孝宗隆興元年（一一六三）進士，敢直諫，長期供職內廷，官至參知政事。樓氏善詩，近古皆工，並博通經史，著述有《攻媿集》一百二十卷。《宋史》卷三九五有傳。

《北行日錄》爲乾道五年（一一六九），以使金賀正使書狀官隨其仲舅汪大猷北行所撰。本書顧名思義，即逐日記錄自十月九日至三月六日北行往返始末，途中見聞等。中以北宋舊京及金都城的城市體制，記錄尤爲詳細，並沿路常有弔古傷今，時時流露出憂時愛國的情緒。本書並收在《攻媿集》書末二卷。

本次整理，以《知不足齋叢書》本爲底本，並參校以《四部叢刊》影武英殿聚珍版《攻媿集》本。底本書末有夾注校記一條，今另移作校勘記。

校勘記

卷上

乾道五年己丑，十月九日辛卯。邸報仲舅侍郎充賀正使，曾總管觀副之。

十日壬辰。蔡興以仲舅書來，辟充書狀官。二親許一行。是日，遊南園。微雨。

十一日癸巳。雨。俶裝。

十二日甲午。陰。

十三日乙未。雨。

十四日丙申。雨。李器之以《鳳棲梧》餞行。

十五日丁酉。雨。周仁甫約同登途。

十六日戊戌。晚晴。仁甫酌別於少微閣，醉中唱和。

十七日己亥。晴。

十八日庚子。晴。飯後別二親，徑出城。張子質一見於驛亭。仲兄器之、元聲、弟灝相送至壽寧寺。仁甫繼至。飲罷東行，宿巖泉夏家店，去城十五里。

十九日辛丑。晴。行二十里，飯午頓驛。行二十五里，宿荆山上方。

二十日壬寅。晴。早登小樓眺望。行十里，飯蔣家店。過縉雲縣，少候仁甫即行，道

經放生潭，山水秀發，策杖縱觀。聞有趙侯廟，鄉人敬之。石有如杖、如履、如甕、如舟者，皆以侯名。雙頭巖、白巖、烏巖，皆奇偉。白巖峭立臨溪，松竹秀潤；烏巖下有石室，端植如門。渡溪入仙都玉虛宮路，回顧南岸，石筍森列，有亭翼然。僕夫曰：「此初陽谷也。中有石鼓，扣之有聲。」以既濟不復往。路轉山回，已見獨峯，大松夾立，清溪映帶，眇視林間，有巨石屹據如雪。且行且觀，遇道童，問石之名，云有洞名「忘歸」。既懲初陽之失，遂回登焉。洞中可容數十人，四旁嵌空，如出鑄斲。旁有小洞，又一石橫陳如臺，松風清微，俯和湍瀨，是真使人忘歸也。下行里許，益近獨峯。峯之上相傳有鼎湖，嘗有巨蓮葉因風而下，石壁隱隱有車轍，世言黃帝由此飛昇。塘曰「黃履」，言遺履之地；地曰「靜樂」，言鈞天至此而不聞。峯後大山如屏，奇石峭崿，始望之高列峯外，自謂倘登其上，必可俯瞰鼎湖。下有銳石，僅如一筍，及即之，後山靡迤而退聽，石筍亦不可跂及。而此峯獨上摩穹漢，巍然削立，無階而升，人有捫蘿登後山之巔者，猶覺未及強半，是知此峯真衆山之宗，非凡目所可窺測也。後山有石空洞，躋攀而上，一竇通明。昔劉先生於竇之外，橫木爲牀以居，至今遺簣猶在，號「隱真洞」，高不可登，悵望久之。循峯而北，又有仙水洞，一名鏡巖，懸崖數十尺，綴石以上，石罅有水，僅如屋漏，終古不竭，下鑿小泓貯之，名公遺墨，鑲滿四壁，迂叟、介夫、趙清獻公皆在焉。攜酒對酌，清坐移時，亦記歲月而還。再至峯下，大書姓字，小憩宮前兩亭。顧瞻偉觀，兀不得去。洞心駭目，生所未見，入據上

方，相與痛飲賦詩，醉墨淋漓，揮掃滿壁，秉燭朗誦，旁若無人。詩榜櫛比，蓋自香山居士而下，不知其幾。閱十之三四，不能盡讀也。宮前有門，書「祈仙總真洞天」。是日，行四十五里。

二十一日癸卯。晴。早復筆詩於版，各置醉墨高處。謁黃帝祠宇，李陽冰篆額，今留縣庠。聞有上宮名妙庭，相去三里而近，他無勝槩。有洞名金龍，一竇通獨峯下，僅容小兒出入，而其中甚寬，宣和間嘗以金龍鎮之，爲陸寇盜去。脚力既倦，不得窮歷。出門相羊峯下，絕溪而西，數里間山川猶競秀未已。有徐氏小亭橫跨練溪，小憩而行，三十里，飯黃碧。邨醪醇醖，不殊家釀。二十八里，宿和尚店，去李溪猶二里。會倅廳一兵楊靖自紹興回，因發家書第一封，錄所題仙都二詩寄仲兄。

二十二日甲辰。夜微霰，早陰晴。行二十七里，飯諸應。行三十餘里，至龍窟。行五里，宿尚書塘。

二十三日乙巳。晴。行二十里，飯楊溪。仁甫由新塘路往四明，分袂於此。田間行久之，猶能相望，將入山，舉手一揖而別。四十里，宿橫塘、暮嶺間張家店。途中惟售溪坊酒頗佳，然比之黃碧，味不及而價又三倍。深夜，微雨即霽。

二十四日丙午。晴。行十餘里，入東陽縣。先見同年姚尉，瀛。次見王宰，楫。爲諸卒批旁小憩一店，尉已先至，再三留一飯，力辭之。行十里，飯愛頭孫家渡。溪行五十里，

宿余店，蓋過蘇溪八里矣。夜微雨。

二十五日丁未。微雨作而復止。行二十二里，飯羅嶺下篆坑何店。行三十五里，宿義井夏店，過牌頭十里。

二十六日戊申。晴，風。過平歷，遇客將李潛等回，發家書第二封。行三十里，飯高擁楊家。行三十五里，宿灰竈頭於店。

二十七日己酉。晴。行三十里，飯溪口傳店。行三十里，宿漁浦鎮上朱店。東陽士人周忠厚同邸，清話久之。夜分小雨作。

二十八日庚戌。微雨，辰已間晴。早作飯了，同周君行數里，三憩方到渡頭，裝載既畢，潮落舟膠，監渡厲君以小舟般剝，已又加一舟，蕩兀波間久之。大舟既前，復挈行李裝載，勞擾良甚。又艤棹食頃，挽繚徐行，近廟山始用櫓。潮上方急，篙櫓努力欲進，爲山石所激，進寸退尺，舟人失色，少縱復上，久方得過。又挽行十餘里，雨霽風靜，一波不興。至六和塔下登岸，已薄暮矣。驅馳至嘉會門，閉關已久，宿俞家店。是日又有松陽一士人姓葉同渡。

二十九日辛亥。晴。早起入城，館於仲舅家。飯罷，侍叔舅同去偽謁副使曾總管。因登三茅山上步司教場，觀仲舅習射。夜發家書第三封。

三十日壬子。晴。同去偽見劉察院待范郎中，成大。久之竟不見客。次遇蔡架閣，霖。

去歲書狀官也。又遇留丞。正臣。飯季舅家。發承局繆欽歸，以第三書行。

十一月一日癸丑。晴。講禮何季膺、葉先生、憲平。閭丘監丞、尤監簿。表。訪及。仲舅赴副使會。

二日甲寅。晴。同去僞習儀都亭驛部中，見梁監門、叔玠。范文、呂郎中。正己。赴景孟舅晚飯。

三日乙卯。晴。習儀驛中已不及，習于參政府。梁郎中訪及。

四日丙辰。天明微雨即霽。使副以下習儀。驛中閱禮物，授衣衫。翟楫及承局翁葉行，兩發家書。仲舅招副使飯。

五日丁巳。晴。習儀政府。候黃御藥甚久。周邵州、伯駿。王智叟、沈尉、德潤。葉主管。翥。訪及。

六日戊午。晴。驛中大習儀，使副以下備衣冠。賈國信、竑。六知閣。張說、張掄、宋鈞、宋直溫、康誥、王抃。偕來，歸寫奏稟。

七日己未。雨。侍叔舅偕去僞赴何季膺、陳叔強。早飯於豐樂樓。

八日庚申。陰。發行李上船。

九日辛酉。雨。下遞擔籠。

十日壬戌。晴。飯了登舟，高伯定、劉君任送出門。張伯純、劉邦達送過赤岸，景孟

舅、姜子用、沈澤遠、王智叟約送長河。

十一日癸亥。晴。飯時過長河九十里，遣第六書發周德歸。午過崇德，蘇彭年來迓。水縮舟膠，牽挽寸進。更初遇士穎弟於官窰。

十二日甲子。晴。飯時過永樂。行二十七里，至秀州。仲舅入城回謁閘頭，登舟風作。李同年唐卿。相見。

十三日乙丑。晴。四更行六十里，過平望。姚漕相訪，仲舅破睡見之。行四十五里，過吳江。又行四十五里，至平江，仲舅入城回謁。船由城外至閘門，叔舅別去。一夕行九十里。

十四日丙寅。晴。早到無錫，攜刺謁孫饒州父子，中途聞其入城，遂謁喻郎中樞。以謝去春先辱。魏子師、子智訪及。行九十里，深夜去毘陵數里泊。

十五日丁卯。晴。生朝，作湯餅。遣人訪李表兄長卿，已同王直甫候於門，蘇彭年亦來，皆延入船相見。王江陰正己。惠茶，并公醞、蘇、李別於荆溪館，直甫同行十里，待書而別。徐協恭過船棹戰。三十六里過奔牛，又十八里過呂城。月明水深，挽舟甚駛，夜行五十四里，過丹陽縣約五更矣。

十六日戊辰。晴。行二十七里，小泊新豐。又二十七里過丹徒鎮，行三十六里，午後到鎮江，以水澀，良久方抵丹陽館。沈抑強中立。既迓於門，又攜具館下，協恭同集。使人

通問於王侍御。

十七日己巳。晴。上館鹽櫛，仲舅欲同謁王侍御，而侍御已在門。侍季舅，同沈抑強、去僞別侍御，聞泊舟金山，因約同遊，窮覽勝處。主僧、寶印。首座心鑑。皆嘉州人，侍御方赴夔州，不謂得見於此，以小詩道別，又辱和篇。入船別其家，遂歸。仲舅招副使早飯。抑強復攜具來，嚴墨卿同集，二鼓方散。

十八日庚午。晴。四更起，天微明即從使副到江干，先登舟以待，沈、嚴二君相送。晴和無風，俄頃至瓜洲登岸，未幾風作。胡撫幹、仲文。俞尉、茂先。陸泰興況。相迓。俟行李上坐船即行，薄暮至揚州。城中水澀，更餘方出城。發第七書遞達親庭。

十九日辛未。晴。三鼓，報送伴鍾尚書世明。等回，仲舅起相見，前處州湯路分逢時。爲鍾引接。送狼頭帽、五指子各一副，拂手香四貼，爲發親庭第八書。又以小舟來過，仲舅方與胡漕昉。對語，因與湯畧見於舟外。少選，鍾尚書、徐知閣本中。船到，仲舅見之。約四更方得行，辰時到召伯埭，去揚州纔四十五里，以夜來留滯故爾。張帆而行，三十里過露筋，三十里到高郵。仲舅入城回謁。兩岸然草如晝。三十里，夜過塘頭。

二十日壬申。晴。三十里過界首，二十五里過范水，三十五里至寶應。夜風雨。行三十里過黃蒲，二十里過平柯橋。

二十一日癸酉。晴。辰時到楚州。仲舅入城回謁。登熙臺，應山陽、藏密。晏判官喆。

一揖於舟次。三十里過磨盤，三十里夜過淮陰，三十里過聞家峯。

二十二日甲戌。晴。三十里到洪澤，前去歐家渡極淺，欲爲般剝計，使副借潮於濱頭神。東北風作，欲候西潮。而申初已應開閘。張帆三十里，過濱頭。使副上廟挂旛。又過數里，舟膠而止。

二十三日乙亥。晴。未明東北風大作，潮亦先期而應。談笑過歐家渡，去濱頭十五里，一行人歡呼而行，且感神貺之如響也。行十五里，至龜山，以風大不可出淮，擺泊山下。見監鎮王，九思。曾同舍。

二十四日丙子。晴。早出淮，三十里至盱眙，泊燕館下。龔守鑒。攜具宴使副，約季舅、去僞分冬。發家書第九封附遞。

二十五日丁丑。晴。冬至。早起乘馬陪使副天慶觀朝拜，歸館，望拜兩宮，各展賀。偕季舅、去僞遊第一山玻璃泉，冰不可酌。遍觀磨崖石刻，見周司法、深。譙提轄、熙載。王幹辦。茂。龔守就館請使副早食，軍衙晚食。

二十六日戊寅。陰晴。使副以下具衣冠，習儀館中。依例就皇華館犒三節人。

二十七日己卯。晴。盱眙客將李寶渡淮探問，接伴使副已到泗州。使副赴龔守晚會，偕季舅、去僞赴王幹辦之招。

二十八日庚辰。晴。掌儀引接等渡淮傳銜，少頃，同北引接禮信司高琚等傳到接伴

使副名銜：正使昭武大將軍、行尚書吏部郎中、上輕車都尉、彭城郡開國伯、食邑七百戶唐括安德，副使朝奉大夫、侍御史、騎都尉、廣陵縣開國男、食邑三百戶、賜紫金魚袋高德裕。使副坐燕館，須其至，犒以三杯而去。移舟淮亭，使副燕亭上。偕季舅、去僞赴譙提轄會。發第九書遣呂葵、張吉歸。

二十九日辛巳。天明雪作。使副以下，已時渡淮至泗州草館，望拜如儀，各就幕次。三節人互參使副，使副互展起居狀，茶酒三行，上馬入城。天色開霽，和氣翕然，至館分位。是日與季舅別。

十二月一日壬午。晴。車行六十里，臨淮縣早頓。縣境有徐城，本徐國嬴姓，有徐君墓，季札挂劍之所。又八十里，宿青陽鎮驛。臨淮尉奪客牛以駕車，爲客所訴，鞭條子八十。金法：士夫無免捶撻者。太守至，撻同知。又聞宰相亦不免，惟以紫褥藉地，少異庶僚耳。

二日癸未。晴，風。車行八十里，虹縣早頓。城門不容車，乘馬入驛。市井多在城外，驛之西有古寺，大屋二層，瓦以琉璃，柱以石，聞其上多米元章諸公遺刻。三年前於寺中待使客。飯後乘馬行八十里，宿靈壁，行數里，汴水斷流，人家獨處者皆燒拆去。聞北人新法：路傍居民盡令移就鄰保，恐藏姦盜，違者焚其居。有一鹿起草間，截馬前。西去兩岸皆奇石，近靈壁東岸尤多，皆宣政花石綱所遺也。虞姬墓在西岸荒草中，橫安二石

板，相去尺餘。隆興間，我得泗虹，以此墓爲界。縣外山上有叢祠，漢高帝廟也。淮北荒涼特甚，靈壁兩岸人家多瓦屋，亦有小城，始成縣。道有粉壁云：準南京都轉運帖，理會買撲坊場。遞鋪皆築小塢，四角插阜旗，遇賀正人使先排兩馬南去。金法：金牌走八騎，銀牌三，木牌二，皆鋪馬也。木牌最急，日行七百里，軍期則用之。

三日甲申。晴。車行六十里，靜安鎮早頓。又六十里，宿宿州。自離泗州循汴而行，至此河益堙塞，幾與岸平，車馬皆由其中，亦有作屋其上。州城新築，雉堞甚整。聞是五月下旬上畔指揮重修，限四旬畢工，費一出於民。城中人物頗繁庶，麪每斤二百一十，粟穀每斗百二十，粟米倍之。陌以六十。大寺數所，皆承平時物。酒樓二所甚偉，其一跨街，榜曰「清平」，護以葦蓆。市肆列觀無禁，老者或以手加額而拜。有倒臥脚引、書鋪般販、官局湯藥、蔡五經家餅子風藥。去州二里許，二郎廟前有下馬亭，即李顯忠斬李福、李保之地。驛舍鄰郡治，顯忠駐軍於此。破城之初，每兵止犒以三鍰，士卒憤惋。及逃歸，創殘之士不能自力，悉碎於敵手，爲數坑埋之。中庭有井，自投者尤多。負郭縣曰符離，項羽破漢軍於靈壁東，睢水爲之不流，即此縣界。

四日乙酉。陰晴，風作。車行四十五里，蘄澤鎮早頓。又四十五里，宿柳子鎮。晚小雪，即止。

五日丙戌。霜寒頗力，行人鬚髮皆冰。六十里，永城縣早頓，驛中猶有燈。縣本芒、